

Retschertgar da chasa anor en l'archiv federal

■ (anr/vi) Ins na sto betg pli ir a Berna per savair tge che l'archiv federal ha da porscher. Dapi l'entschatta da quest onn po mintgin retschertgar online da chasa anor en ils registers da l'archiv. Ins po era reservar documents via internet. Fin uss èn ils registers da trais departaments federals accessibels sin Hyperlink «<http://www.swiss-archives.ch>» www.swiss-archives.ch, nummadain dal departament da giustia e polizia, dal departament per l'exteriur e dal departament per traffic ed ambient. Per il mument pon ins retschertgar pli ch'in milliun dossiers da l'archiv. Leger ils documents na pon ins dentant betg. Per gliez ston ins er en il futur prender la via sut ils pes ed ir a Berna en l'archiv federal. Igl è dentant pussaivel d'empustar in document giavischè per internet, uschia ch'il material è pront per l'invista cura ch'ins visita l'archiv. En il decurs da quest onn porscha l'archiv federal lura er ils registers dals ulteriurs departaments federals per la retschertga online.

Entras la nova purschida obtegnan ins a la svelta – da chasa u biro anor – ina survista tar tge tematicas e fatschentas che l'archiv posseda infurmaziuns.

55 kilometers palpìri

«L'archiv è in pau sco la memoria dal stadi federal», explitgescha *Guido Koller*, pledader da l'archiv. Ils documents impurtants che pertutgan il stadi svizzer vegnan archivads: Actas dal parlament, dal cussegl federal e da l'administraziun.



Dapi l'entschatta da quest onn po mintgin retschertgar online da chasa anor en ils registers da l'archiv.

KEYSTONE

Istorichers, schurnalists e l'administraziun nizzegian il material. Ma era persunas privatas fetschian diever da l'archiv, per exempel umens pli vegls che s'interessian per la defensiun da la patria durant la Segunda guerra mundiala u anteriurs fu-

gitivs che veglian savair tge palpìris ch'il stadi svizzer possedia anc sur dad els.

En tut magazineschia l'archiv documents d'ina lunghezza da 55 kilometers, di Koller per illustrar la dimensiun da questa instituziun. I na saja betg pussai-

vel da pretender investa en tuts documents – cunzunt en las actas pli actualas. Per regla stettian ils documents ils emprims trenta onns sut protecziun. Tar dossiers da persunas cuzzia la protecziun schizunt tschuncanta onns.